
HARANGVE

D'ALEXANDRE LE FORGERON,

PRONONCEE AV
Conclaue des Reformateurs.

PROVERB. 20.

Le Roy seant au trône de iugement, dissipe tout mal par son regard.





HARANGVE.

DAR mafoy, Messieurs, si vous me demandiez ce que i'ay à proposer sur ce tapis, ie serois bien empesché de vous le dire, tant ie voy d'embarras aux affaires de la Reformation, & n'en faut point mentir, que si l'eusse creu d'enfourner si mal, ie ne fusse iamais bougé de Paris d'aupres de mes maçons: Mais puisque la fatalité en ordonne ainsi, encore ne faut-il pas ietter le manche apres la coignee. Ma consolation est que iene seray pas seul celebré en l'histoire, pour auoir plus entrepris, que ie n'ay peu faire. Car Monsieur Rose iadis Euesque de Senlis, se trompa aussi bien que moy en son calcul, s'imaginant la leuce de plusieurs miliers de soldats, comme vn exain de mouches en l'air pour le seconrs de la saincte Ligue ,a ne prendre mesme (disoit ce bon, Prelat) qu'vn homme pour clocher. Certes à ce queie voy lesbonnes coustumes se perdent, tout s'altere, tout se corrompt, il n'y a plus d'ardeur ny de zele à brouiller, comme i'ay veu autresfois en ma ieunesse, sur toutlors que la feu Royne Mere me vouloit honorer

gratis de la Capitainerie de la Bastille, si iene fusse deslogé sans trompette, & quand de plus fraische debte, vn homme que vous cognoissez, curieux de sçauoir toutes choses, s'en alla en diligence apprendre l'Allemand chez le Comte Palatin, pour se rendre tousjours plus vule au seruice de Henry quatriesme son bien - faicteur, apres l'auoir assisté d'vn memorable secours au siege d'Amiens, & en la guerre de Sauoye. Touten fin n'est auiourd'huy que froideur & lascheré de courage, à reformer les Royaumes à ma mode. Les Coqs de nostre Parroisse, que ie croyois estre les plus bouillans, ont tous à ce coup esté froids comme glace, les vns paramour & respect, les autres par foiblesse & manque de pouuoir. Il n'est pas iusqua ce grand Pontife, qui ne s'amusant plus aux visions de son Mystere d'iniquité, me veut mettre à ceste heure en ombrage parmy toutes les Synagogues de la France, aufquelles il ne chante par ses lettres que les benedictions de la paix, & la liberté dé leurs consciences, leur faisant accroire que le suis homme qui ne veux que faire mes affaires, & puis les laisser là, comme ie sis, dit-il, à l'assemblee de Saumur. D'ailleurs, les Mouchars que i'ay dans les Prouinces, me donnent aduis que celles où nous presumons d'estre les Maistres, disent tout haur qu'elles ne veulent point taster de nostre Reformation. Car faisans la guerre, le

premier mal tomberoit sur leurs testes, soit en gardant eux mesmes nuict & iour les portes & les murailles de leurs villes contre leurs voisins, soit en y receuant garnison, veu la seruitude où ils s'engageroient, si leurs vies & leurs fortunes despendoient de la garde d'autruy, les bons Citoyens se contentans de viure paisiblement du leur, n'y ayant que quelquesaffamez & saffraniers qui desirét la picorée du bœuf & de la vache. Quand à des hommes pour en faire de grandes leuces, on m'escrit qu'ils en ont fort peu de reserve. & presque point qui vueillent quitter de veuele tuy au de leur cheminee, pour me venir trouuer si loing; quelque bruit que nous facions courre, qu'il y a de l'ordre & dela police en nos trouppes, soubs couleur de trois ou quatre miserables que nous auons desia faict pendre, pour auoir baise les seruantes de leurs hostes en prenant congé. Car il n'y a soldar pour d'amoureuse complexion qu'il soit, qui ne se passe volontiers de ce bel ordre. Les Ministres font aussi grandement apprehender à leurs ouailles, la desolation qui seroit ineuitable à tout plein de bergeries esparses ça & la dans le Royaume, comme est entre autres l'Eglise Metropolitaine de Charanton, toutes lesquelles maudiroient celuy, qui les exposant en proye, auroit troublé leur repos.

O temps! ô mœurs! quelest cest endur-

cissement de cœur? Où est ceste premiere ferueur de nos peres? Où est le zele furieux & turbulent de nostre Eglise primitiue il ya enuiron quarante ou cinquante ans? Tout est-tellement refroidy, que i'oserois gager que de cent Huguenots qu'il y a, il ne s'en trouveroit pas le quart qui endurast le feu, pour maintenir dans Rome, que le Pape soit l'Antechrist. Et si pour le bien de la Resormation, il y en falloit tout presentement enuoyer deux, ie croy qu'à peine sourniroit on

d'vn second auecmoy.

Vous vous souriez Messieuts, de me voir ainsi tordre la moustache, & que i'aye pris pour corps de deuise en ma cornette six paires de lunettes sur vn nez haut en couleur auec ces deux mots Grecs. V N D E A V X I L I V M? De regarder du costé de l'Allemagne pour en tirer des Reistres & des Lansqueners, ie ne me suis pas encore faisy dés reliques & des calices de Sainct Denis pour les payer, estimant qu'à peine sortiroient-ils du pays sur ma simple parole. Pour l'Angleterre, ce Roy est si pacifique & si conscientieux à force de lire le siure des Roys qu'il hayt comme le diable tous suiets qui se mutinent contre leurs Souuerains, parce que luy-mesme estant du mestier, a interest à l'inuiolable conservation de leur authorité. Quantaux Republicains nos voisins, ce sont vrayement gens qui s'entendent des mieux 2

la reformation des grandes Monarchies, & qui les trouvent bien plus belles en pourpoinct, que non pas reuestues de ces longues tuniques Royales: Mais ie voy bien qu'en l'estat que sont aujourd'huy leurs affaires, ils ont plus besoing de la France que d'Alexandre le Forgeron. Il n'y a non plus que faire pour nous en Suisse. Voila comme tout nous manque, & comme le recognois que l'Almanach de Beauregard n'est qu'vn menteur quec ses predictions fabuleuses, n'y ayant eu villes capitales, Parlemens, peuples, ny Noblesse de marque, qui se soient laissez engluer comme font les moineaux quandilneige. Car tout ce que nous auons peu faire depuis trois mois, ç'a esté de ramasser çà & la quelques quatre mil hommes de pied, bons que mauuais, auec vir peu de caualerie pour nous venir promener sur le paué de Soissons, où nous sommes entrez en pompe, afin qu'on ne die point que si apres Pasques nous faisons plas de bien, qu'on n'en esperoit de nous en kareline ce ne soit pas par foiblesse de pounoir proceder à la reformation, cest espouuentail d'ayant point si peu operé, qu'il n'ait desia enchery a Paris le foin, l'auoine, le fagots le coteret, & li le bois de corde hausse vne fois à la Greue, il y en aura de mal chauffez.

Or depenser faire le fin auec vous, vous ne me cognoissez que trop de par Dieu. Il n'est pas icy question de semettre sur les belles paroles, & de vous faire vn long discours sur masidelité & bonne affection au service de leurs Majestez, c'est chose que vous n'ignorez pas, & que vous sçauez autant ou peutestre mieux que moy. Il faut seulement aduiser ce qui se peut faire maintenant, à ce que ces Messieurs remportent quelque contentement de ceste conference, sir l'yssuë de laquelle toute la France a auiourd'huy les yeux iettez. Pour moy estant homme accort qui sçait faire & deffaire, afin qu'on nem'estime pas vn boutefeu qui se vueille rendre l'horreur de la posterité, si on m'en veut croire, ie suis d'auis que tout ce qui s'est faict iusqu'a present, se soit passé comme par ieu, & que nous acceptions la bonne volonté de la Royne, retournans iouyr doucement de sa bienueillance, & participer aux continuelles graces & faueurs, que ceste bonne Princesse, nous a tousiours departies, dont ie ne seraviamais le moins du monde ingrat, recognoissant ses liberalitez comme ie faits. Et si selon vostre goust il y a quelque chose à desirer au gouvernement du Royaume, soit pour la distribution des charges, soit pour le soulagement des peuples, remettons cela à la tenue des prochains Estats generaux, puisque sa Majesté auoir dessa resolu de les conuoquer auant que nous les eussions demandez. Si cependant on trouue bon que iesoulage Monsieur le President Ieannin

leannin au maniement des finances, l'engage ma soy & mon honneur, d'y saire mieux mes assaires en trois mois, que ce bon homme n'y sera les siennes en toute sa vie. Ie serois bien aussi ce me semble le Chancelier à vn besoing, pour bailler sorce cire verte aux gens d'honneur. Si mesme l'ossice de Connestable n'est supprimé par mort, ie l'aymerois bien autant pour moy que pour vn autre.

l'estime qu'il vaut mieux s'accommoder ainsi à l'amiable; sans toutesfois en faire semblant d'abord, afin de mieux faire valoit le talent. Car d'entreprendre contre la Royauté, nulle guerre n'est iuste si elle n'est necessaire. Or de necessité il n'y en a certes point, l'Estat estant pacifique & florissant comme il est, ains ce seroit vne violence du tout inique, quelque pretexte que nousempruntions du bien public, veu que la voix du peuple, de qui nos trouppes deuorent la substance, crie vengeance deuant Dieu, la seuere iustice duquel armera tellemeur le bras du Roy, de force & de puissance, que nous demeurerons en fin accablez en nos desseins, si nous n'allons au deuant de son indignation. Car tout passionné qu'on me croit estre, ie nesuis point si aueugle que ie ne voye bien, qu'à mesme temps que nous serons les fascheux, & que nous aurons reietté les raisonnables conditions, que leurs Maiestez nous

offrenc, on laschera apres nos fesses des Leuriers de si bonne race, que nous maudirons l'heure d'auoir iamais entrepris vne si malheureuse besongne. Et s'il nous arrivoit de perdre en vn combat sanglant ce peu de forces que nous auons, la reformation ne seroit-elle pas gaulée sans ressource? Où est le Gentil-homme qui peust sortir de sa maison à vingt lieues de nous, sans auoir soudain vn Preuost dans sa basse-cour pour luy saisir & confisquer ses biens à l'eternelle misere de sa femme & de ses enfans? De vous asseurer beaucoup de moy ny de mon chasteau, outre ce que i'ay à y penser plus d'vne fois auant que de me bander ouvertements contre le Roy, vous pouuez bien croire que ie ne vous fouffrirois pas d'y entrer les plus forts, comme l'estime que nous sommes icy. Courage ô bons & fideles habitans de Soissons, vous meritez d'auoir l'honneur d'estre des premiers reformez apres Mezieres nostre fille aisnée. Tout cela meurement consideré. ie concluds qu'il se faut accommoder au cours du marché, ayant si mal pris nos mesures. Helas! ie ne cognois que trop l'humeur des gens, que nous desirons se ierrer entre nos bras. Iesçay que toute nouueauté plaist d'abord à quelques François: Mais ce sont des ceruelles qui ne peuuent pas longuement demeurer en vne mesme resolution. Ce qu'ils louent aujourd'huy, ils le

blasment demain. Ils controllent tout, ils murmurent de tout, & rien ne leur agree que ce qu'ils font; tel pensant bien faire l'homme d'Estat, qui a peine seroit bon Procureur de Chastelet. Bref ce sont esprits chagrins qui se plaignent de tout, qui s'ennuvent detout, autant impatiens en la jouysfance du bien, qu'en la souffrance du mal. De sorte que ne les pouuas retenir par recompense de leurs seruices, n'en ayans le moyen, ny ne se voulans laisser beffler de vaines esperances, il est mal aisé d'asseoir sur eux aucun fondement. Nous auons beau leur prescher que tout s'en va estre reformé en la Iustice, aux armes, & que les charges de la maison du Roy ne se vendront plus. Ce qui est bon à diremaintenant, apres que moy qui parle, ay pour exemple de reformation vendu à beaux deniers contans celle quei'y auois; la baillant au Seigneur que l'ay toussours aimé, où pour mieux dire recherché, tant que l'ay creu qu'il me pouvoit ayder à faire mes affaires. Ne nous reposons donc que de bonne sorte fur ces girouettes. Car quelque essor aque prennent telles gens ils reuiennent toufiques loger à l'espée royalle, & quelques mutins qu'ils soient en la chaleur de leur mescontentément, ils trempent leur vin, ils reuiennent à eux, & aiment tousiours mieux vn grand Roy, foir mineur, ou homme faict, que de se voir asseruis sous le joug de tant de

petits Maistres & de petits Salmonées qui ne penuent gresler que sur le persil. Auec cela il est à craindre que ce cauteleux serpent de division ne se glisse parmy vous, Messieurs, sur tout quand se viendra au departement des charges de ceste grande armée inuisible (ie voulois dire inuincible) dont vous ne serez pas si tost d'accord que du butin, lequel ie preuoye estre si reformé, que vous en aurez autant les vns que les autres. Je n'apprehende pas ceste division sans cause, parce que ie voy desia du refroidissement à quelques vns. Ie ne sçay mesme si vous Monsieur qui faictes si bonne chere à la reformation, auriez point quelque regret sur le cœur, s'il vous falloit estre delvny de vostre maison, adherant sur tout à vn heretique comme i'ay l'honneur d'estre, vous qui estes fils de ce genereux Prince, qui imitant la pieté de ses Ayeulx, n'espargna iamais son sang pour la deffence de la Religion Catholique, laquelle vous pouvez bien croire, que moy & mes semblables voudrions voir exterminée aux défpens de vos propres testes. Et à ceste heure que ie parle d'accommoder les affaires, ie ne feindray point de vous dire rondement comme feroit vn Capucini, que le seul blasme & reproche qu'on vous peut faire que ie suis en voître compagnie est capable de vous rendre odieux à toute la France, de crainte qu'on a que vous faciez aussi maunais fruict

que moy, & qui estois né Catholique fils de

bon pere & de bonne mere.

Regardez moy Messieurs, regardez-moy de trauers tant que vous voudrez, ie vous dy franchement que ie vous tromperois si ie vous allois promettant beaucoup de seruice, Vous vovez, ie suis vieux, casse, gousteux, & si mal sain dans les corps, que iene suis pas pour viure si long-temps si Dieu plaist. Non que ie ne puisse dire sans me flatter, que ie suisassez vaillant de ma personne: mais au reste le plus malheureux homme du monde à la guerre. Vous sçauez comme ie sus faict prisonnier en Flandres, vous sçauez, ce qui m'arriua à Dourlans, & n'en espere pas mieux en toute autre part, quoy que le bruit coure à Paris que ie me suis vanté de passer sur le ventre du regiment des gardes, auec ce peu d'infanterie que nous auons. Si ceste parole m'est eschappee ç'a esté en dormant, parce que ie ne dois pas ignorer, que les soldats de ceste trouppe ne soient autant de Lyons conduicts par desplus braues & valeureux Capitaines de la France qui m'en feroient bien tost perdre l'enuie. I'ay de plus reputation de n'estre pas fort bon Maistre, pour obliger les honnestes gens à suiure ma fortune, nul de mes seruiteurs ne s'estant jamais fait Banquier au sortir ne chez moy, D'ailleurs ie me voy en cest aage chargé d'enfans, & nesçay come apres moy, ma Sou-

ueraineté leur seroit asseurce, si ie mourois aux mauuaises graces du Roy, de la bien-veillance & protection duquel, ie la tiens autant que de droiet que i'y aye. le regarde que si d'autre costé, i auois pour ennemy vn Roy d'Espagne, ie serois fort mal en voisins, & c'est ce qui me fait tant resuer sut ceste alliance, ne sçachant bonnemet si ie la doibs persuader ou non Si ie dy qu'il la faille sursoir, en attendant l'occasion de la rompre tout à fait, ie feray plaisir à quelques vns, à qui l'vnion de ces deux couronnes oste le moyen de pouuoir brouiller. Mais au reuers de la medaille, fila France ne la faisant point, auoit à viure en mauuaile intelligence, auec vn Prince si puissant, ie ne sçay pas si la frontiere & le dedans du Royaume en seroient plus asseurez, veu les diuisions & partialitez qui rongent les entrailles de cest Estat. Il y a tant à conside, rer là dessus, que pour n'y rien faire à l'estourdie, il vaut mieux remettre à en conferer à l'assemblee des trois Ordres, lesquels soubz le bon plaisir de leurs Maiestez resoudront s'il ya plus de iustice de reienter l'alliance du Roy d'Espagne qui est Catholique, que d'accepter celle du Roy d'Angleterre qui est Protestant, & sitoutes deux ne sont pas à desirer pour le salut du Royaume.

Sur ceste attente ie vous conseille Messieurs, d'aller tirer le premier cartier de vos pensions à Paris, ne quittans pas le certain pour l'inceris

rain, comme fist le chien d'Esope, qui prist l'ombre pour le corps. Car de vous refier sur moy, ie vous declare que ie vous pourrois suiure cinquante ans, auant que de faire marcher les Tresoriers de l'Espagne à vostre queue, n'y ayant d'autre part teston à prendre en ce pays, qui ne fust baigné dans les larmes de la vefue & de l'orphelin. Si vous vous en retournez vous me ferez vn singulier plaisir sans que vous preniez la peine de me reuenir voir, vos allees & venues me coustant desia bon, dont ie me gratte les oreilles, & qui pis est ie n'en oserois encores demander recompense à la Royne, puisque la rigoureuse discipline de la reformation porte qu'il se faut du commencement oublier soy-mesme, & ne parler que du bien public, qui est vrayement ce que ie cerche.

Ie preuoy en fin que si vous ne vous rangez à vostre deuoir, le Sacrificateur ne ietra iamais tât de pechez du peuple d'Israel sur la teste du bouc qu'il chassoit au desert, que vous serez hays, maudits, & detestez d'vn chacun, n'y ayat si petit Escolier qui ne sueillette son Calepin, pour y trouuer de nouuelles imprecations en vostre faueur. Ce n'est pas qu'on en vueille particulierement à vos personnes, lesquelles on honore: Mais l'ambition, la rancune, la discorde, sont les mauuaises Conseilleres qu'on abhorre en vous, comme celles qui vous portent à cest aueuglement, de ne considerer pas que tout ainsi que les braches se seichent, & n'ont plus de vie le tronc de l'arbre estant portépar terre: De mesme si par vos tumultes & confusions vous auiez debilité la vigueur du Chef de l'Fstar, vous qui estes les parties nobles de ce corps, vous verriez bien tost reduicts en vne piteuse condition, pour le peu de respect que vous rendroient des peuples. que vous auriez affriandez au libertinage & à la desobeissance. Retournez doc Messieurs, retournez d'où vous estes partis. Car aussi bien'ya il point de Cour, ny d'authorité legitime, que la où est le Roy, ou son aueu, non plus qu'il n'y avoit point d'image vivante de Republique qu'a Rome, quoy que Pompée se vantast de l'auoir emmenée auec luy, soubs couleur de quelques Citoyens & Senateurs qui le suiuoient en campagne, & lesquels en leur foiblesse ne le peurentiamais garantir de la ruine contre Celar.

S. Paul à Timoth. Epist. 2. ch. 4.

Alexandre le Forgeron m'a faiet beaucoup de maux, le Seigneur luy rendra selon ses œuures.